

An de vergaangenen zwee Joer stellt ee fest, datt et a ville Géigenden an Europa zu enger Stagnatioun am Bezuch op d'Akzeptanz mee och der rechtlecher Gläichstellung vu LGBTIQ Persounen komm ass. A vereenzelte Länner stellt een esou eng Réckwärtsentwécklung statt. Déi prominentst Beispiller si sécherlech Polen, wou sech eng ronn 100 Stied, Gemengen a Regiounen zu sougenannte „LGBTIQ Free Zones“ deklariéiert hunn, an Ungarn, wou an de leschte 24 Méint Gesetzter a Bestëmmungen entstane sinn, déi d'Rechter vu LGBTIQ Persounen nees aschränken.

Als Reaktioun dorobber huet d'EU-Parlament am Mäerz Europa als „LGBTIQ Freedom Zone“ erkläert. Zënter hir sinn eng ganz Rei Stied, ewéi Paräis oder Wien, déi dat selwecht op lokalen Niveau gemaach hunn.

Untrag

Besonnenesch an dësen Zäit, wou d'Membere vun der LGBTIQ+ Communautéit nach ëmmer mat Ufeindungen, Diskriminéierung a Gewalt liewe mussen a wou sech matzen an Europa iwwer 100 Stied, Gemengen a Regiounen a Polen als „LGBTIQ-fräi Zonen“ deklariéieren, ass et eis en Uleies, entsprechend der Erklärung vum Europäesche Parlament vum 11. Mäerz 2021¹, dëse Mënschen aus eiser Mëtt e siichtbaart Zeeche vun der Ënnerstëtzung ze ginn an eis Stad Esch dofir symbolesch als „LGBTIQ Freedom Zone“ ze deklariéieren.

D'Stad Esch versteet sech als eng fuerweg an oppe Stad a mir betruechten dës Deklaratioun dofir als en Optrag an e Verspriechen, fir der queerer Communautéit en séchert Doheem ze garantéiert a fir sämtlech Ustrengungen ze ënnerhuelen, fir Diskriminéierung an Haass ze bekämpfen an eisen Deel zu méi Gläichberechtigung an Akzeptanz bäizedroen.

¹ https://ec.europa.eu/commission/presscorner/detail/fr/ip_20_2068